

Weh Wi Ga Fi Seh

Harikayn Seezn 2023 di
don! Krismos di kohn!

Da hoo don di taak bowt Krismos?

Wel! Ah si **Salvayshan Aami** ketl deh owt! In fak, fos taim Ah mi si mi laydi fren di sidong wid di Salvayshan Aami ketl bai wahn soopamaakit da-mi Mondeh a disya week. Now, if dat noh maak dat Krismos di kohn, mi fren, mee noh noa weh uda signal dis beta! Eena di paas, da-mi wen maali geh put dong, ahn da stil soh eena lat a hows kraas di konchri a Bileez. Pahn tap, da-mi wen sohn Krismos ting weh doz hapm bayli di hapm now. Unu kuda tink a sohn a dehnya ahn sen tel mi? Di eemayl deh rait da batam biloa a dis aatikl.

Now, Ah noa seh dat jankunu daansa stil di kohn bowt eena groop, rong Krismos taim, speshali eena sohn paat a Bileez Siti bai weh mi aanti doz liv. Ahn Gaylz Pt. stil ga ih Krismos Bram ahn sambai daansin. Di layt Miz Myrna Manzanares doz tel wi stoari bowt how sambai daansa dehn eena Gaylz Pt. doz goh bowt fahn hows tu hows bak wen shee da-mi pikni deh.

If yu di si Disemba pahn yu front doa, gi tanks!